

KANTON SARAJEVO

Skupština Kantona

Na osnovu člana 18. stav (1) tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04), Skupština Kantona Sarajevo, na sjednici od 12. marta 2007. godine, donijela je

ZAKON

O SPRJEČAVANJU NASILJA I NEDOLIČNOG PONAŠANJA NA SPORTSKIM PRIREDBAMA

POGLAVLJE I - OSNOVNE ODREDBE

Član 1. (Primjena)

Ovim Zakonom utvrđuju se mjere za sprječavanje nasilja i nedoličnog ponašanja na sportskim priredbama, kao i obaveze organizatora i ovlašćenja nadležnih organa u sprovođenju tih mjera na području Kantona Sarajevo (u daljnjem tekstu: Kanton Sarajevo).

Član 2. (Definicije)

- (1) Sportske priredbe, u smislu Zakona o sportu Kantona Sarajevo i ovog Zakona su sportska takmičenja i sportske manifestacije.
- (2) Organizator sportske priredbe je organizacija u sportu sa sjedištem na području Kantona Sarajevo i to: sportski savez, sportsko društvo, sportska organizacija - klub, te drugo pravno ili fizičko lice koje se stalno ili povremeno bavi organizacijom sportskih priredbi, odnosno koje je preuzelo organizovanje određene sportske priredbe, ili vršenje određenih poslova u organizovanju sportske priredbe.
- (3) Vrijeme održavanja sportske priredbe, u smislu ovog Zakona, je vremenski period potreban za organizovan i bezbjedan dolazak i ulazak gledalaca u gledalište prije početka sportske priredbe, uključujući i vrijeme trajanja same sportske priredbe, te vrijeme potrebno za njihov siguran i bezbjedan izlazak iz sportskog objekta i odlazak nakon njenog završetka, a čije trajanje u svakom konkretnom slučaju utvrđuje organizator sportske priredbe u saradnji sa Ministarstvom unutrašnjih poslova Kantona Sarajevo (u daljnjem tekstu: Ministarstvo), prilagođavajući dužinu tog vremena karakteru sportskih priredbi (npr. sportske priredbe povećanog rizika).
- (4) Učesnici sportske priredbe, u smislu ovog Zakona, su sva lica prisutna na sportskoj priredbi.
- (5) Sportski objekat, u smislu Zakona o sportu Kantona Sarajevo i ovog Zakona, je zatvoreni i otvoreni objekat namijenjen za održavanje sportskih priredbi, koji pored sportskog terena može da ima i gledalište.
- (6) Sportski teren, u smislu ovog Zakona, je prostor na kome se obavlja sportska aktivnost (sportska igra, takmičenje), kao i prostor do gledališta.

Član 3. (Dužnosti organizatora sportske priredbe)

- (1) Organizator sportske priredbe, u saradnji sa Ministarstvom dužan je da osigura bezbjedno održavanje sportske priredbe i da preduzme mjere kojima se predupređuje i spriječava izbijanje nasilja i nedoličnog ponašanja gledalaca, i to:
 - a) preventivne mjere;
 - b) redovne mjere koje se preduzimaju na svim sportskim priredbama;
 - c) mjere koje se preduzimaju na sportskim priredbama povećanog rizika;
 - d) mjere koje preduzimaju Ministarstvo, sudovi i zavodi za izdržavanje prekršajnih kazni.

(2) Kad organizacija u sportu povjeri organizaciju sportske priredbe ili vršenje određenih poslova u organizaciji sportske priredbe drugom pravnom ili fizičkom licu, dužna je da vrši nadzor nad sprovođenjem mjera utvrđenih ovim zakonom.

Član 4. (Nasilje i nedolično ponašanje)

(1) Pod nasiljem na sportskim priredbama, u smislu ovog Zakona, smatra se naročito:

- a) fizički napad na učesnike sportske priredbe;
- b) fizički obračun između učesnika na sportskoj priredbi;
- c) bacanje na sportski teren ili u gledalište predmeta koji mogu da ugroze život, fizički integritet lica ili imovinu;
- d) isticanje obilježja, transparentata, te izvikivanje slogana kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv ili nepristojan, a što može da dovede do fizičkih sukoba navijača ili drugih učesnika te ugrozi život ili integritet lica odnosno oštećenje ili uništenje imovine;
- e) oštećivanje sportskog objekta, opreme, uređaja i instalacija na sportskom objektu na kome se održava sportska priredba;
- f) izazivanje nereda prilikom dolaska, odnosno odlaska sa sportskog objekta ili u sportskom objektu, ometanje toka sportske priredbe ili ugrožavanje bezbjednosti učesnika sportske priredbe ili trećih lica.

(2) Pod nedoličnim ponašanjem na sportskim priredbama, u smislu ovog Zakona, smatra se naročito:

- a) neovlašteni ulazak na sportski teren;
- b) neovlašteni ulazak u službene prostorije i službene prolaze sportskog objekta na kome se održava sportska priredba;
- c) unošenje u sportski objekat i upotreba alkohola ili drugih opojnih sredstava;
- d) unošenje u sportski objekat odnosno korišćenje pirotehničkih sredstava i drugih predmeta i sredstava kojima može da se ugrozi bezbjednost učesnika u sportskoj priredbi ili ometa njen tok;
- e) neovlašten ulazak u dio gledališta sportskog objekta namijenjen suparničkim navijačima.

Član 5. (Primjena propisa)

Na organizovanje sportskih priredbi shodno se primjenjuju i propisi o javnom redu i miru i okupljanju građana.

Član 6. (Nadzor nad sprovođenjem Zakona)

Nadzor nad sprovođenjem ovog Zakona vrši Ministarstvo.

POGLAVLJE II - MJERE ZA SPRJEČAVANJE NASILJA I NEDOLIČNOG PONAŠANJA NA SPORTSKIM PRIREDBAMA

Odjeljak A. Preventivne i redovne mjere

Član 7. (Preventivne mjere)

(1) U cilju preventivnog djelovanja i smanjenja rizika izbijanja nasilja i nedoličnog ponašanja gledalaca, organizacije u sportu dužne su da:

- a) podstiču organizovanje i sportsko (fair play) ponašanje svojih navijača i njihovih klubova;
- b) ostvaruju odgovarajuće informisanje svojih navijača (sastanci sa navijačima, izdavanje biltena i dr.);
- c) koordiniraju aktivnosti sa klubovima svojih navijača prilikom organizovanog odlaska na gostujuće sportske priredbe;
- d) uredе sportskim pravilima iz svoje nadležnosti koje se sportske priredbe smatraju visoko rizičnim i koje mjere su organizatori sportskih priredbi i drugi učesnici dužni da preduzmu, u skladu sa zakonom i drugim propisima, na sportskim priredbama visokog rizika;
- e) preduzmu druge mjere i aktivnosti, u skladu sa zakonom, propisima donijetim na osnovu zakona i sportskim pravilima.

Član 8.
(Redovne mjere)

- (1) Organizator sportske priredbe je dužan da obrazuje odgovarajuću redarsku službu, ili da angažuje pravno lice ili preduzetnika radi obavljanja poslova fizičkog obezbjeđenja i održavanja reda na sportskoj priredbi.
- (2) Prilikom vršenja poslova iz stava (1) ovog člana redarska služba je ovlaštena da:
 - a) zabrani pristup sportskom objektu licima koja su pod uticajem alkohola ili drugih opojnih sredstava, ili se iz njihovog ponašanja može zaključiti da su skloni nasilnom ili nedoličnom ponašanju;
 - b) efikasno odvoji gostujuće navijače usmjeravanjem na posebne ulaze i izlaze iz sportskog objekta i poseban dio gledališta koji je za njih određen;
 - c) onemogući ulazak gledalaca na sportski teren;
 - d) onemogući unošenje ili prodaju alkoholnih pića u sportskom objektu;
 - e) onemogući unošenje u sportski objekat predmeta koji se mogu upotrijebiti u nasilničkim postupanjima (pirotehnička sredstva, palice, flaše i sl.), odnosno kojima se može ometati tok sportske priredbe (ogledala, laserski pokazivači, zvučni uređaji veće snage, transparenti ili obilježja kojima se podstiče rasna, vjerska, nacionalna ili druga netrpeljivost i mržnja, odnosno čiji je sadržaj uvredljiv ili nepristojan i sl.);
 - f) upozori, odnosno udalji gledaoce zbog nedoličnog ponašanja kojim se može izazvati nasilje na sportskoj priredbi ili ometati njen tok.
- (3) Kad gledalac ili grupa gledalaca postupi suprotno nalogu redarske službe ili izazove nasilje, o tome se bez odlaganja obavještava ovlašteno lice Ministarstva.

Član 9.
(Saradnja organizatora i Ministarstva)

- (1) Organizator je dužan da ostvari saradnju i obezbijedi prisustvo predstavnika Ministarstva na sportskim priredbama povećanog rizika, a u ostalim slučajevima kada procijeni da je to potrebno radi sprovođenja mjera i naloga koji se odnose na održavanje javnog reda i mira.
- (2) Organizator je dužan da za vrijeme sportske priredbe obezbijedi prisustvo odgovarajuće službe hitne medicinske pomoći i vatrogasne jedinice, kao i da ostvari saradnju, a po potrebi preduzme mjere da obezbijedi i prisustvo drugih nadležnih organa i organizacija, javnih službi i javnih preduzeća (inspekcijske i komunalne službe i dr.).
- (3) Ministarstvo na osnovu prijave organizatora o održavanju sportske priredbe i ocjene relevantnih elemenata o rizicima ugrožavanja stanja sigurnosti i preduzetih mjera organizatora, određuje broj i postupke policijskih službenika koji obezbjeđuju javni red i mir na određenoj sportskoj priredbi.

Odjeljak B. Sportske priredbe povećanog rizika

Član 10.

(Mjere koje se preduzimaju na sportskim priredbama povećanog rizika)

- (1) Sportske priredbe povećanog rizika su:
 - a) domaće i međunarodne sportske priredbe od većeg takmičarskog značaja;
 - b) sportske priredbe na kojima se očekuje prisustvo velikog broja gledalaca ili navijača gostujućih klubova;
 - c) druge sportske priredbe kad posebne okolnosti ukazuju da na njima može doći do nasilja ili nedoličnog ponašanja gledalaca.
- (2) Koje se domaće i međunarodne sportske priredbe u smislu stava (1) tačka a) ovog člana mogu smatrati od većeg takmičarskog značaja, određuje svojim aktom nadležni sportski savez.
- (3) Ministar unutrašnjih poslova Kantona Sarajevo, po zaprimljenom obavještenju od strane organizatora o vremenu održavanja sportske priredbe povećanog rizika, odredit će lice ovlašteno za koordinaciju ukupnih aktivnosti svih subjekata koji učestvuju u organizaciji te sportske priredbe kako bi sve preventivne, redovne i posebne mjere određene ovim Zakonom nadležni organi i službe preduzeli blagovremno i efikasno.

Član 11.

(Postojanje povećanog rizika od izbijanja nasilja)

- (1) Kad okolnosti iz člana 10. ovog Zakona ukazuju na rizik od izbijanja nasilja i nedoličnog ponašanja gledalaca na sportskoj priredbi, organizator sportske priredbe je dužan da:
 - a) o tim okolnostima obavijesti bez odlaganja, a najkasnije 48 časova prije početka sportske priredbe, Ministarstvo i druge nadležne organe, nadležni sportski savez i druge zainteresovane organizacije u sportu, kao i sportiste koji učestvuju u sportskoj priredbi;
 - b) odredi odgovorno lice koje je zaduženo za rukovođenje sprovođenjem mjera za sprječavanje nasilničkog i nedoličnog ponašanja gledalaca i za saradnju sa Ministarstvom;
 - c) ostvari saradnju sa Ministarstvom radi postupanja po nalogima koji se odnose na obezbjeđivanje javnog reda i mira na sportskoj priredbi i radi obezbjeđivanja rada dežurnog sudije za prekršaje;
 - d) ostvari saradnju sa predstavnicima klubova navijača u cilju međusobne razmjene informacija i obezbjeđenja da klubovi navijača odrede dio redara na sportskoj priredbi iz svojih redova, radi pružanja pomoći u održavanju reda na sportskoj priredbi i obavještanja gledalaca.
- (2) Organizator sportske priredbe u saradnji sa odgovornim licem Ministarstva iz tačke b) stav (1) ovog člana može prekinuti sportsko takmičenje i odrediti da se isprazni dio ili cijelo gledalište u slučaju masovnog ispoljavanja rasne, vjerske, nacionalne ili druge netrpeljivosti i mržnje.
- (3) Nakon praznjenja gledališta sportska priredba se može nastaviti ili odložiti u skladu sa važećim pravilima.

Član 12.

(Obaveze na dan odvijanja sportske priredbe)

- (1) Organizator je dužan da prije početka, za vrijeme trajanja i po završetku sportske priredbe povećanog rizika:
 - a) omogućiti odvajanje grupa gostujućih navijača prodajom ulaznica na odvojenim i posebnim prodajnim mjestima;
 - b) omogućiti da se u prodaju puste samo ulaznice za mjesta za sjedenje, odnosno onoliki broj ulaznica za stajanje koji, u zavisnosti od kapaciteta sportskog objekta, ne ugrožava bezbjednost učesnika sportske priredbe;

- c) ostvari saradnju sa sportskim klubovima koji učestvuju u sportskoj priredbi u pogledu prodaje ulaznica za njihove navijače;
- d) odredi posebne ulaze, izlaze i dio gledališta za grupe gostujućih navijača, ukoliko se očekuje njihov organizovani dolazak ili dolazak u većem broju;
- e) obezbijedi preko programa sportske priredbe ili drugih sredstava informisanja podsticanje gledalaca na korektno ponašanje.

Član 13.
(Evidencije navijača)

- (1) Organizator je dužan da u saradnji sa sportskim klubovima koji učestvuju na sportskoj priredbi i klubovima njihovih navijača obezbijedi vođenje evidencije o identitetu lica kojima se ulaznice prodaju, odnosno ustupaju preko klubova navijača, kao i da omogući uvid u te evidencije ovlaštenom licu Ministarstva.
- (2) Ministarstvo je dužno uspostaviti i uredno voditi evidenciju lica kojima je izrečena zabrana prisustvovanja određenim sportskim priredbama.

Član 14.
(Prodaja ulaznica na dan sportske priredbe)

- (1) Na dan održavanja sportske priredbe povećanog rizika ulaznice se po pravilu ne mogu prodavati u sportskom objektu na kome se sportska priredba održava ili u njegovoj neposrednoj blizini, već samo na posebnim prodajnim mjestima.
- (2) Odobrenje za određivanje prodajnih mjesta iz stava (1) ovog člana daje Ministarstvo.

Član 15.
(Uvjeti koje treba da ispunjava sportski objekat)

- (1) Sportski objekat mora imati Plan evakuacije ovjeren od strane nadležne Policijske uprave.
- (2) Plan evakuacije mora sadržavati opisane procedure postupanja u slučaju vanrednih situacija (rušenje konstrukcija, požar, nestanak svjetla, masovni neredi, dojave o podmetnutim minsko-eksplozivnim sredstvima i sl.) kao i jasan šematski prikaz evakuacionih koridora.
- (3) Sportski objekat koji je kategorisan kao objekat za međunarodne sportske manifestacije mora imati Certifikat o bezbjednosti objekta (stadiona) ovjeren od strane Ministarstva.
- (4) Certifikat o bezbjednosti objekta se izdaje na rok od godinu dana, a na osnovu prethodno izvedenih pozitivnih inspeksijskih nalaza iz oblasti elektro zaštite, gromobranske zaštite, protivpožarne zaštite, opremljenosti sredstvima i opremom za pružanje prve pomoći, higijensko-tehničke ispravnosti javnih toaleta, statičke nosivosti karakterističnih konstrukcija, ulazno-izlaznih kapija, koridora i zaštitnih ograda.
- (5) Organizator je dužan da obezbijedi da se sportska priredba povećanog rizika održi u sportskom objektu koji ima:
 - a) odgovarajuće ograde ispred sportskog objekta za usmjeravanje i razdvajanje suparničkih grupa navijača;
 - b) odgovarajuće ograde za sprječavanje ulaska gledalaca na sportski teren;
 - c) odgovarajuće ograde za razdvajanje suparničkih grupa navijača;
 - d) odgovarajući broj jasno i vidljivo obilježenih ulaza i izlaza prema svim dijelovima gledališta;
 - e) odgovarajuća sjedišta koja se ne mogu otkinuti samo korištenjem fizičke snage;
 - f) odgovarajući prostor za ovlašteno lice Ministarstva, nadležnog za održavanje javnog reda i mira na sportskoj priredbi sa kojeg ima jasan pregled sportskog terena i gledališta;

- g) tehničku opremu za praćenje i snimanje ponašanja gledalaca na sportskom objektu;
- h) prostoriju za pružanje hitne medicinske pomoći;
- i) odgovarajući broj muških i ženskih mokrih čvorova u svim dijelovima gledališta;
- j) prostor za bezbjedan smještaj prijevoznih sredstava gostujućih klubova;
- k) sistem javnog razglasa;
- l) odgovarajuće osvjetljenje ukoliko se sportska priredba održava u večernjim časovima, kao i obezbjeđeno neprekidno napajanje električnom energijom.

(6) Uvjete iz stava (1) do (5) ovog člana dužan je da ispuni i organizator drugih sportskih priredbi, osim uslova utvrđenih tačkama a), c), f), g) i j) stava (5) ovog člana.

(7) Bliže uvjete iz stava (1) do (5) ovog člana i njihovu ispunjenost utvrđuje nadležni sportski savez, odnosno organizacija u sportu, uz prethodno pribavljeno mišljenje Ministarstva kulture i sporta Kantona Sarajevo i saglasnost Ministarstva.

Član 16. (Obaveze gostujućeg sportskog kluba)

Gostujući sportski klub koji učestvuje na sportskoj priredbi povećanog rizika obavezan je da:

- a) najkasnije tri dana prije organizovanog polaska navijača na sportsku priredbu obavijesti organizatora sportske priredbe o svim elementima bitnim za prijem kluba i njegovih navijača (dan i vrijeme polaska, procijenjena broja navijača koji dolaze, način prijevoza, mjesto boravka ili okupljanja, imena vođa navijača i sl.);
- b) ostvari saradnju sa klubom svojih navijača i učestvuje u organizaciji njihovog dolaska na sportsku priredbu;
- c) obezbijedi raspodjelu karata za svoje navijače koje je dobio od organizatora sportske priredbe;
- d) preduzme druge potrebne mjere da klub i njegovi navijači ne budu uzrok nasilja i nereda na sportskoj priredbi.

Odjeljak C. Mjere koje preduzima Ministarstvo

Član 17. (Mjere za sprječavanje nasilja i nedoličnog ponašanja)

(1) Ministarstvo prilikom održavanja sportskih priredbi povećanog rizika može da naloži preduzimanje svih potrebnih mjera za sprječavanje nasilja i nedoličnog ponašanja gledalaca, a naročito da:

- a) naloži grupama gostujućih navijača kretanje određenim pravcem prilikom dolaska, odnosno odlaska iz sportskog objekta;
- b) naloži organizatoru sportske priredbe otklanjanje uočenih nedostataka sportskog objekta ili propusta u organizaciji;
- c) zabrani ulazak na sportsku priredbu, odnosno udalji od sportskog objekta lice iz čijeg se ponašanja može zaključiti da je sklono nasilničkom i nedoličnom ponašanju.

(2) Ministarstvo pred sportsku priredbu povećanog rizika, najmanje 24 časa prije njenog početka, vrši pregled sportskog objekta na kome će se sportska priredba održati i ostvaruje uvid u organizacione pripreme te osigurava da objekat blagovremeno, u skladu sa važećim procedurama, bude pretražen radi otkrivanja prisustva eventualno podmetnutih eksplozivno diverzantsko-terorističkih sredstava.

Član 18.
(Zabrana prodaje alkohola)

Zabranjena je prodaja alkoholnih pića na prilazima, u neposrednoj blizini i u sportskom objektu tri časa prije i po završetku sportske priredbe povećanog rizika, kao i za vrijeme njenog održavanja.

Odjeljak D. Troškovi sprovođenja mjera

Član 19.
(Troškovi)

- (1) Organizator sportske priredbe snosi troškove koji se odnose na preduzimanje mjera iz članova 7.-15. ovog Zakona.
- (2) Organizator može sa Ministarstvom zaključiti ugovor o obavljanju određenih poslova obezbjeđenja sportske priredbe i sprovođenja određenih mjera za sprječavanje nasilja i nedoličnog ponašanja gledalaca, koji ne spadaju u redovne poslove održavanja javnog reda i mira.
- (3) Ugovor iz stava (2) ovog člana u ime Ministarstva zaključuje ministar nadležan za unutrašnje poslove.
- (4) Prihodi ostvareni obavljanjem poslova i sprovođenjem mjera iz stava (2) ovog člana prihod su budžeta Kantona.

POGLAVLJE III - KAZNENE ODREDBE

Odjeljak A. Krivično djelo

Član 20.
(Nasilničko ponašanje na sportskoj priredbi)

- (1) Ko u namjeri da izazove nasilje uđe na sportski teren ili ulaskom u sportski teren izazove nasilje, fizički napadne na učesnike sportske priredbe, unese u sportski objekat ili baca na sportski teren ili među gledaoce predmete, pirotehnička sredstva ili druge eksplozivne, zapaljive ili škodljive supstance koji mogu da izazovu tjelesne povrede ili ugroze zdravlje učesnika sportske priredbe ili učestvuje u fizičkom obračunu na sportskoj priredbi, kazniće se zatvorom od tri mjeseca do jedne godine.
- (2) Ko u grupi izvrši krivično djelo iz stava (1) ovog člana, kazniće se zatvorom od šest mjeseci do tri godine.
- (3) Kolovođa grupe koja izvrši krivično djelo iz stava (1) ovog člana, kazniće se zatvorom od jedne do pet godina.
- (4) Na postupak izricanja kazne za maloljetnu osobu koja učini pojedino krivično djelo iz stava (1) do (3) ovog Zakona, odgovarajuće se primjenjuju odredbe zakona kojim je uređen krivični postupak u Federaciji Bosne i Hercegovine.

Odjeljak B. Prekršaji

Član 21.
(Novčana kazna za organizatora i odgovorno lice)

- (1) Novčanom kaznom od 1.000 do 10.000 KM kazniće se za prekršaj organizacija u sportu ili drugo pravno lice ako:
 - a) ne osigura nesmetano i bezbjedno održavanje sportske priredbe (član 3. stav (1) ovog Zakona);
 - b) ne vrši nadzor nad sprovođenjem mjera utvrđenih ovim Zakonom (član 3. stav (2) ovog Zakona);
 - c) ne preduzme propisane preventivne mjere (član 7. ovog Zakona);
 - d) ne organizuje, odnosno ne angažuje odgovarajuću redarsku službu (član 8. stav (1) ovog Zakona);
 - e) odbije saradnju sa Ministarstvom (član 9. stav (1) ovog Zakona);

- f) ne obezbijedi za vrijeme sportske priredbe prisustvo odgovarajuće službe hitne medicinske pomoći ili ne ostvari saradnju sa drugim nadležnim organima i organizacijama (član 9. stav (2) ovog Zakona);
 - g) ne preduzme propisane mjere kada su okolnosti ukazivale da postoji rizik da dođe do nasilja ili nedoličnog ponašanja gledalaca ili ne postupi po nalogima Ministarstva u vezi održavanja sportske priredbe povećanog rizika (član 11. ovog Zakona);
 - h) ne preduzme propisane mjere prije početka, za vrijeme trajanja i po završetku sportske priredbe povećanog rizika (član 12. ovog Zakona);
 - i) ne obezbijedi ograničenje prodaje ulaznica iza sportske priredbe povećanog rizika ili ne obezbijedi vođenje propisanih evidencija, odnosno ne; pruži ih na uvid ovlaštenom licu Ministarstva (član 13. stav (1) ovog Zakona);
 - j) prodaje ulaznice van odobrenih posebnih prodajnih mjesta (član 14. ovog Zakona);
 - k) ne obezbijedi da se sportska priredba povećanog rizika održi u odgovarajućem sportskom objektu (član 15. stav (1) do (5) ovog Zakona);
 - l) u svojstvu gostujuće ekipe ne preduzme zakonom propisane mjere (član 16. ovog Zakona);
 - lj) prodaje alkoholna pića suprotno zabrani (član 18. ovog Zakona).
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 200 do 2.000 KM.
- (3) Za prekršaj iz stava (1) ovog člana fizičko lice koje je organizator sportske priredbe kazniće se novčanom kaznom od 200 do 1.000 KM.
- (4) Za prekršaj iz stava (1) ovog člana preduzetnik će se kazniti novčanom kaznom od 200 do 1.000 KM.
- (5) Pravnom licu kome je izrečena kazna za prekršaj iz stava (1) ovog člana može se uz izrečenu kaznu izreći i zaštitna mjera zabrane vršenja određene djelatnosti.
- (6) Odgovornom licu kome je izrečena kazna za prekršaj iz stava (1) ovog člana može se izreći i zaštitna mjera zabrane vršenja određenih poslova.
- (7) Preduzetniku kome je izrečena kazna za prekršaj iz stava (1) ovog člana može se izreći i zaštitna mjera, zabrana obavljanja samostalne djelatnosti.

Odjeljak C. Zaštitna mjera

Član 22.

(Zabrana prisustvovanja sportskim priredbama)

- (1) Uz kaznu za prekršaj fizičkom licu može se izreći zaštitna mjera zabrane prisustvovanja određenim sportskim priredbama, pod uvjetima propisanim ovim Zakonom.
- (2) Zabrana prisustvovanja određenim sportskim priredbama sastoji se u obavezi učinioca prekršaja, da se neposredno prije početka određenih sportskih priredaba lično javi službenom licu u odjeljenju unutrašnjih poslova, odnosno policijskoj stanici, na području na kojem se učinilac prekršaja zatekao i da boravi u njihovim prostorijama do završetka sportske priredbe.
- (3) Zaštitna mjera iz stava (1) ovog člana može se izreći u trajanju od tri mjeseca do jedne godine.

Odjeljak D. Novčana kazna za fizička lica

Član 23. (Novčana kazna)

- (1) Novčanom kaznom od 500 do 1.500 KM, kaznit će se za prekršaj fizičko lice ako:
- a) oštećuje sportski objekat na kome se odvija sportska priredba, njegovu opremu, uređaje, instalacije i drugi inventar (član 4. tačka e) ovog Zakona;
 - b) baca bilo kakav predmet na sportski teren ili u gledalište, ili ometa odvijanje sportske priredbe posebnim tehničkim sredstvima ili drugim napravama (član 4. tač. c), f) i j) ovog Zakona;
 - c) neovlašteno ulazi u sportski teren (član 4. tačka g) ovog Zakona;
 - d) za vrijeme održavanja sportske priredbe, kao i neposredno prije ili poslije održavanja sportske priredbe neovlašteno ulazi u službene prostorije i službene prolaze sportskog objekta na kome se odvija sportska priredba (član 4. tačka h) ovog Zakona;
 - e) za vrijeme održavanja sportske priredbe unosi u sportski objekat ili upotrebljava alkohol ili opojna sredstva (član 4. tačka i) ovog Zakona;
 - f) neovlašteno uđe u dio gledališta namijenjen suparničkim navijačima (član 4. tačka k) ovog Zakona;
 - g) ne postupi po nalogima službenog osoblja iz člana 8. stav (2) ovog Zakona;
 - h) postupi suprotno zabrani, odnosno obavezi iz člana 22. stav (2) ovog Zakona.
- (2) Uz kaznu za prekršaj iz stava (1) tač. a) - g) ovog člana fizičkom licu se može izreći zaštitna mjera zabrane prisustvovanja određenim sportskim priredbama.
- (3) Za ponovljeni prekršaj iz stava (1) tač. a) - g) i za prekršaj iz stava 1. tačka h) ovog člana, zaštitna mjera zabrane prisustvovanja određenim sportskim priredbama izriče se obavezno.
- (4) Ako prekršaj iz stava (1) ovog Zakona učini maloljetnik, odgovarajuće se primjenjuju posebne odredbe kantonalnog zakona o odgovornosti i kažnjavanju maloljetnika za prekršaje.
- (5) Roditelj, usvojlac odnosno staralac maloljetnika mlađeg od 16 godina, koji učini prekršaj iz stava (1) ovog Zakona, ako je izvršenje prekršaja od strane maloljetnika posljedica njegovog propuštanja dužnog staranja o maloljetniku, a bio je u mogućnosti da takav nadzor vrši, kazniće se za prekršaj novčanom kaznom u iznosu od 50 do 500 KM.

POGLAVLJE IV - PRIJELAZNE I ZAVRŠNE ODREDBE

Član 24. (Rok za usklađivanje akata)

Organizacije u sportu i druga pravna i fizička lica koja se bave organizovanjem sportskih priredbi uskladiće svoja akta sa ovim Zakonom u roku od šezdeset dana od njegovog stupanja na snagu.

Član 25. (Ravnopravnost spolova)

Sve imenice koje se odnose na pojedine funkcije i sportske i druge djelatnike, upotrijebljene u ovom zakonu samo u muškom ili samo u ženskom rodu, odnose se na oba spola.

Član 26.
(Prestanak primjene)

Stupanjem na snagu odredbi ovog Zakona prestaju sa važenjem kaznene odredbe iz člana 7. Zakona o javnom redu i miru ("Službene novine Kantona Sarajevo", br. 9/99 i 16/02) za prekršaje propisane ovim Zakonom.

Član 27.
(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-4313/07
12. marta 2007. godine
Sarajevo

Predsjedavajući
Skupštine Kantona Sarajevo
mr. **Denis Zvizdić**, s. r.
